

# **Enyaarubha ya kabhiri ya Pauro ku Bhakoriinto Obhutaangiro**

Enyaarubha yino yakaamirwe na Pauro, omweega wa Yeesu Krisito. Enyaarubha yino ni ya kabhiri ku Bhakrisito bha mumugye gwa Koriinto bhano tunabho mu Biburia. Nawe munyaarubha yino Pauro arakeerenerya enyaarubha eyiindi yino Abhakoriinto bhayiruuzi haari (rora 2:3-4). Enyaarubha yiyo etariho eziisiku zino. Hamwe na riyo, Pauro areerekye obhuzomererwa bhwaaye kwe ekigirirye kya amang'ana gano asuung'aaniri kuhitira ku Tito kubha, Abhakrisito bha Koriinto eyo bhatigiri ebhibhi bhyaabhu.

Kino kyagirirye Pauro akakaama enyaarubha yino, kyaari okweerekeererya abhiikirirya bha Koriinto gano bhakweenderwa kukora mubhwiikirirya bhwaabhu. Arabhakaamira kubha, bhiirihe na abheegya bho orurimi bhano bhiisikiirye kwa bhwiibhisi mukansa no okweegya amang'ana go orurimi. Abheegya bhayo bhaari bharabhuga kubha, Pauro atari omweega we eheene wa Krisito. Ebho bhakabha bhariikora nibho abheega abhakuru. Kugayo, Pauro ariisasaama kubha ewe ni mweega we eheene, kweeki ano obhuturo okurwa ku Krisito. Arakora ego kwe enzira yo okubhabhuurira Abhakoriinto obhukuru bhwa Taatabhugya

bhurakuunaanibhwa mubhunyoobhu.  
 Kweeki areerekeererya Abhakoriinto iguru yo  
 okuhokeerya eziimbirya zyaabhu okusakirya  
 abhaatu bha Taatabhugya ne emirimo gye  
 ekanisa muhagiyo ahaandi.

### *Obhukeerya*

<sup>1</sup> Enyaarubha yino nikaamiri enye Pauro,  
 nikabhirikirwa kubha omweega wa Krisito Yeesu  
 kwo obhuseegi bhwa Taatabhugya, hamwe na  
 Timoteo, omwiikirirya omurikyeeu.  
 Nirabhakaamira emwe bhano muri mukansa ya  
 Taatabhugya mumugye gwa Koriinto.  
 Tubhakaamiiri emwe hamwe na abhahoreeru\*  
 bhoosi bha Taatabhugya bhano bhari mukyaaro  
 kya Akaaya.

<sup>2</sup> Orubhaango no omureembe okurwa ku  
 Taatabhugya Taata weetu, na ku Mukuru Yeesu  
 Krisito, bhibhe neemwe.

### *Taatabhugya aragosorerya munyaako*

<sup>3</sup> Akumibhwe Taatabhugya, Taata wo  
 Omukuru weetu Yeesu Krisito, Taata we  
 ebhigoongi, niwe Taatabhugya wuno  
 akutugosorerya mugoosi.

<sup>4</sup> Ewe aratugosorerya munyaako yeetu yoosi,  
 okubha na neetwe tunagye kubhagosorerya  
 abhaandi bhano bhari munyaako ya tuubho  
 maanga maaru, kyeego tukugosororibhwa na  
 Taatabhugya.

---

\* **1:1 Abhahoreeru.** Rora eng'ana yino mu Bhugaruri bhwa  
 Amang'ana Amakong'u.

<sup>5</sup> Kyeego tukugeenderera kubhona enyaako kwiiguru wa Krisito, egoego Taatabhugya arageenderera kutugosorerya kuhitira ku Krisito.

<sup>6</sup> Hano tukunyaaka, turanyaaka kwiiguru wo obhugosorerwa bhweenyu no obhutuurya bhweenyu. Kweeki, hano etwe tukugosororibhwa, niho neemwe mukusuung'aana obhugosorerwa. Obhugosorerwa bhuyo, bhurabhasakirya okukong'era munyaako yiryayirya yino na neetwe tukunyaakira.

<sup>7</sup> Eriisigo ryeetu kweemwe ni ikuru, kwo okubha tumenyiri kubha, kyeego mukunyaaka kye etwe, niigo mukugosororibhwa kye etwe.

<sup>8</sup> Abhahiiri bheetu, tureenda mumenye kyeego twanyaakiri mukyaaro kya Asia. Enyaako yino twabhweeni, ekatutama kukira obhunagya bhweetu, naabhe tukiiseega kubha tuungakuuri.

<sup>9</sup> Kwe eheene tukiiyigwa kyamuna twaari tutiniirwe ekiina kyo okukwa. Riyo rikatuuka, okubha tutige okwiisigira eziinguru zyeetu, nawe tumwiisige Taatabhugya, wuno akuryoora abhaku.

<sup>10</sup> Ewe niwe akatutuurya okurwa muhabhi hakuru ho okukwa, kweeki arageenderera kututuurya. Etwe turamwiisigira kubha ewe arakora ego eribhaga ryoosi,

<sup>11</sup> eraabhe murasakirania na neetwe kwo okutusabhira ku Taatabhugya. Ewe ariigwa amasabhi geenyu no okututweera etwe ebhite. Niho abhaatu bhaaru bharaamukumye Taatabhugya kwiiguru weetu.

*Pauro arakubhya orugeendo rwo okugya Koriinto*

<sup>12</sup> Ambe, etwe turiikumya kwiing'ana rimwe. Emitima gyeetu giratumenyeekererya kubha, twiikeeri kwo obhuhoreeru na kwo obhuheene muno bhukurwa ku Taatabhugya. Tutaakoriri ego kwa amang'eeni geetu, nawe kwo orubhaango rwa Taatabhugya. Niigo twiikeeri mukyaaro hano, na kiindi mubhwiigwaani bhweetu na neemwe.

<sup>13</sup> Tutakubhakaamira amang'ana makong'u, nawe turabhakaamira gano mukunagya kusoma no okumenya bhuzomu. Nine eriisigo kubha, muratumenyeekererya bhuzomu,

<sup>14</sup> yiingabha kwa bhoono muratumenyeekererya kwa hasuuhu. Niriisiga kubha muramenyeekererya bhuzomu okubha orusiku runo Omukuru Yeesu arakyoore, muriikumya iguru weetu, kyeego na neetwe tukwiikumya iguru weenyu.

<sup>15</sup> Niari no obhuheene bhwa amang'ana gayo, na gayo nigo gagirirye niari ndeenda kuhika hiinga kweemwe, okubha mubhone orubhaango kabhiri kwo okutaarirwa neenye.

<sup>16</sup> Nikeenda kuhita kweemwe eyo, eriibhaga ryo okugya mukyaaro kya Makedonia ne eriibhaga ryo okurwa Makedonia, okubha munisakirye murugeendo rwaane rwo okugya Yudea.

<sup>17</sup> Bhoono, muriiseega kubha nikaamura kukubhya orugeendo rwaane rwo okuuzza kweemwe, kwo okubha enye ni muutu wo okwiikyoorakyoora? Kasi muriiseega kubha nirakaangatibhwa na amiiseego gaane ageene,

niigo gakukora nigaambe “Niigo” eribhaga rimwe, ne eribhaga eriindi kweeki nibhuga “Zeyi”?

<sup>18</sup> Nawe bhoono, kyeego Taatabhugya ari muheene, gano tukabhabhuurira emwe, gatabheeri go omuutu abhuge, “Niigo” ne eribhaga riindi abhuge, “Zeyi.”

<sup>19</sup> Nirabhuga ego, kwo okubha Yeesu Krisito, Omwaana wa Taatabhugya,† wuno enye, Sirwano‡ na Timoteo twaabharwaaziiri emwe, ataari omuutu wo okubhuga, “Niigo,” eribhaga rimwe, ne eribhaga eriindi kweeki abhuge, “Zeyi.” Nawe kweewe eribhaga ryoosi arabhuga, “Niigo.”

<sup>20</sup> Niigo, kwe ekigirirye goosi gano Taatabhugya akaragania, gakuunaaniri kuhitira ku Yeesu Krisito. Nikyo tukugaamba kuhitira Yeesu Krisito, “Gabhe ego,” kwiiguru yo okumuguungya Taatabhugya.

<sup>21</sup> Ambe, Taatabhugya niwe akutugumirya etwe na neemwe kwo okumwiikirirya Krisito. Atusoriri

<sup>22</sup> no okutubhaasa orubhaaso kwo okutuhaana Ekoru Muhoreeru§ muziikoro zyeetu, okubha abhe omwiimeerereri wa goosi gano Taatabhugya akutuha.

<sup>23</sup> Gano nikubhuga ni ge eheene, naabhe Taatabhugya niwe omumenyeekererya waane!

---

† **1:19 Omwaana wa Taatabhugya.** Rora amang’ana gano mu Bhugaruri bhwa Amang’ana Amakong’u. ‡ **1:19 Sirwano,** mukitabhu kya Amahokya ga Abheega arabhirikirwa *Siira*. § **1:22 Ekoru Muhoreeru.** Rora amang’ana gano mu Bhugaruri bhwa Amang’ana Amakong’u.

Nitaakyooriri kweemwe Koriinto, kwe ekigirirye niteendiri okunyahaara eziikoro zyeenyu.

<sup>24</sup> Kino nikweenda kubhuga ni kubha, tutakweenda okubhaaha obhwiikirirya bhweenyu, kwo okubha mugumiiri mubhwiikirirya. Nawe, etwe ni bhabhagati hamwe na neemwe, kwiiguru yo obhuzomererwa bhweenyu.

## 2

<sup>1</sup> Kweego, nikaamura kubha, nitaaza kweeki kweemwe, okubha nitagirya mubhe ne ebhigoongi.

<sup>2</sup> Eraabhe enye niraagirye mubhe ne ebhigoongi, ni weewi araanikore nizomererwe? Ni neemwe abheene bhano niabhakoreeri ebhigoongi!

<sup>3</sup> Kiyoyiyo ekigirirye nikabhakaamira munyaarubha yirya, kubha nitakuuza kweemwe, nitaaza kubhona ebhigoongi kweemwe, bhano mukweenderwa kunikora nizomererwe. Nino obhuheene kubha hano nikuzomererwa, neemwe mwoosi murazomererwa.

<sup>4</sup> Nikabhakaamira enyaarubha yirya kwe eziinyaako haari na kwe ebhigoongi mukoro yaane, kweeki kwe eziingusuri nzaru. Ekigirirye kyaane kitari kubha mubhe ne ebhigoongi, nawe niari nireenda mumenye kyeego nibhaseegiri bhukong'u.

### *Obhwaabhiri kwo omubhi*

<sup>5</sup> Eraabhe, omuutu wuno amukoreeri ebhigoongi omurikyaaye, ataanikoreeri enye

omweene, nawe kwe enzira endebhe abhakoreeri neemwe mwoosi. Nawe bhoono nitakweenda kukurya amang'ana bhukong'u.

<sup>6</sup> Enyaako yino omuutu wuyo yabhweeni okurwa kubhwaaru bhweenyu, yiisiri.

<sup>7</sup> Bhoono, mureenderwa okumwaabhira no okumugosorerya omuutu wuyo, okubha ataaza kubha ne ebhigoongi bhyaaru, tee okukwa ekoro.

<sup>8</sup> Kweego, nirabhiisasaama mumweerekye kubha mumuseegiri.

<sup>9</sup> Ekigirirye ekiindi kino kyakoriri nikabhakaamira enyaarubha yirya, kyaari ni kubhareengya, okubha nimenye kyeego muunganiigwiiri mugoosi.

<sup>10</sup> Hano mukwaabhira omuutu wurya, na neenye woosi niramwaabhira. Ne eraabhe rireho eriang'ana rino nikweenderwa kumwaabhira, nimariri okumwaabhira embere wa Krisito kwiiguru weenyu,

<sup>11</sup> okubha Seetaani\* ataaza kutuhiza, kwe ekigirirye tumenyiri bhuzomu obhung'eeni bhwaaye.

### *Pauro mumugye gwa Turoa*

<sup>12</sup> Ambe, hano niahikiri mumugye gwa Turoa okurwaaza Amang'ana Amazomu iguru wa Krisito, nikabhona Omukuru amariri okuniigurira enzira yo okukora emirimo gyaaye eyo.

<sup>13</sup> Nawe ntaari no omureembe mukoro yaane, kwe ekigirirye nitamubhweeni Tito eyo, omwiikirirya omurikyaane. Kweego,

---

\* **2:11 Seetaani.** Rora eng'ana yino mu Bhugaruri bhwa Amang'ana Amakong'u.

nikabharaga abhaatu bhe eyo, nikabhuuka kugya mukyaaro kya Makedonia.

*Okuraarika obhuhizi bhwa Krisito*

<sup>14</sup> Nawe turamubhuurira, “Ozomirye, Taatabhugya,” kwe ekigirirye aratukaangata eriibhaga ryoosi kuziirira obhuhizi bhwa Krisito. Kweeki aratukora etwe tunyaraganie obhumenyi bhwa amang’ana iguru wa Krisito hagiho hoosi, kyeego obhuraangaasiro bhuzomu bhukunyaragana hoosi.

<sup>15</sup> Niigo, kwo okubha etwe ni kyeego amaguta go omuruumbaaso amazomu gano Krisito akumuruusirya Taatabhugya. Amaguta gayo garabhahikira abhaatu bhoosi, bhano bhakutuuribhwa na bhano bhakubhura.

<sup>16</sup> Kubhano bhakubhura, obhuhuzu bhuyo ni bhubbiihu, bhurareeta oruku. Nawe kubhano bhakutuuribhwa, obhuhuzu bhuyo ni bhuzomu, bhurareeta obhuhoru. Bhoono, ni weewi wuno akunagya kukora emirimo giyo gyo okurwaaza amang’ana amazomu ga Krisito?

<sup>17</sup> Etwe tutari kya abhaatu abhaandi bhano bhakukorerera obhusuruzya eng’ana ya Taatabhugya, okubha bhabhone obhweera. Nawe etwe, kwa amanaga ga Krisito, turarwaaza eng’ana ya Taatabhugya kwo obhuheene bhwoosi kyeego abhaatu bhano twatumirwe na Taatabhugya, tukubha tugwaateeni na Krisito.

### 3

*Abhahokya bhe eriiragano eriihya*

<sup>1</sup> Mbe, muriiseega kubha turataanga kweeki okwiikoombakoomba kweemwe? Zeyi, etwe

tutari kya abhaatu abhaandi bhano  
bhakubhareetera eziinyaarubha zyo  
okumumenyeekererya, kasi kusabha okurwa  
kweemwe eziinyaarubha zyo  
okumumenyeekererya kubhaatu abhaandi.

<sup>2</sup> Emwe niimwe enyaarubha yeetu, yino  
ekaamirwe muziikoro zyeetu, na abhaatu bhoosi  
bharanagya okuyisoma no okuyimenyeekererya.

<sup>3</sup> Mureereky a kubhweero kubha mubheeri  
enyaarubha yo okurwa ku Krisito, yino  
ekweereky emirimo gino twaakoriri kweemwe.  
Enyaarubha yiyo etaakaamirwe kwo obhwiino,  
nawe ekaamirwe ne Ekoru wa Taatabhugya  
wuno ari muhoru. Kweeki etaakaamirwe  
kumabhaara ga kwiitare, nawe ekaamirwe  
muziikoro zya abhaatu.\*

<sup>4</sup> Turagaamba gayo, kwo okubha tuno  
obhwiisige bhuyo ku Taatabhugya kuhitira  
Krisito.

<sup>5</sup> Etari turiiseega kubha turanagya kukora  
kyokyoosi kwo obhunagya bhweetu abheene,  
nawe obhunagya bhweetu bhurareka ku  
Taatabhugya.

<sup>6</sup> Ewe niwe akatuha obhunagya bhwo okubha  
abhahokya bhe eriiragano erihya.† Eriiragano‡  
riyo ritakutuukana ne emigiro gino  
gyakaamirwe, nawe rirarwa kwe Ekoru  
Muhoreeru, kwo okubha emigiro girareeta  
oruku, nawe Ekoru wa Taatabhugya arareeta  
obhuhoru.

---

\* **3:3** Rora Okurwa 24:12, 31:18; Yeremia 31:33. † **3:6** Rora  
Yeremia 31:31-34. ‡ **3:6 Eriiragano.** Rora eng'ana yino mu  
Bhugaruri bhwa Amang'ana Amakong'u.

### *Obhuguungo bhwe eriiragano eriihya*

<sup>7</sup> Emigiro gino gyakaamirwe kumagina, gino gikareeta oruku, gikaaza kwo obhuguungo bhuno bhukumesy, tee Abhiiziraeri bhakatamwa kumurora Musa§ mubhusyo. Bhakatamwa kwo okubha obhuguungo bhuyo bhukamesya bhukong'u, nawe bhukamesya kwiibhaga iguhi ego, okumara bhukazuunzazuunza.\* Eraabhe obhuhokya bhwe emigiro gino gikureeta oruku gikaaza kwo obhuguungo kya bhuyo,

<sup>8</sup> bhoono obhuhokya bhwe Ekoru Muhoreeru bhutakubha no obhuguungo kutuumaho?

<sup>9</sup> Eraabhe emirimo gino gikukora abhaatu okutinirwa ekiina gino obhuguungo, emirimo gino gikukora abhaatu kubha bhe eheene embere wa Taatabhugya gino obhuguungo bhukuru kutuumaho!

<sup>10</sup> Kweego, obhuguungo bhwe eriiragano rye ekare bhutakuriing'aana no obhuguungo bhwe eriiragano eriihya, kwo okubha eriiragano eriihya rino obhuguungo bhukuru kukiraho.

<sup>11</sup> Eraabhe kino kyaariho kwiibhaga iguhi kyaari no obhuguungo, bhoono kino kiraabheho kirakeego kino obhuguungo kukiraho.

<sup>12</sup> Ambe, kwo okubha tune eriisigo riyo, turakora kwo obhukaari.

<sup>13</sup> Etwe tutakukora kya Musa, wuno akiikuundikirya mubhusyo kwe ekitaambaara,

---

§ **3:7 Musa.** Rora eng'ana yino mu Bhugaruri bhwa Amang'ana Amakong'u. \* **3:7** Rora Okurwa 34:29-30.

okubha Abhiiziraeri bhatarora obhweero bhuno bhwaari bhukusiriikirira.†

<sup>14</sup> Nawe Abhiiziraeri bhateendiri kumenyeekererya. Tee bhoono hano bhakusoma Eriiragano rye Ekare, bharatamwa okumenyeekererya obhuheene, bharabha kya bhano bharibhirwe ekitaambaara kirya. Ekitaambaara kiyo kikyaari kuruusibhwaho, kiraruusibhwaho hano omuutu akumwiikirirya Krisito.

<sup>15</sup> Ni heene, tee reero yino, hano bhakusoma ebhitabhu bhye emigiro gya Musa, ekitaambaara kiyo kirakuundikirya eziikoro zyaabhu, bhatamenyeekererya obhuheene.

<sup>16</sup> Nawe omuutu wowoosi wuno aramukyoorera Omukuru, Omukuru aramuruusya ekitaambaara kiyo.

<sup>17</sup> Bhoono, Omukuru niwe Ekoru, na hano Ekoru wo Omukuru ariho, niho obhwiiragaanzi bhuri.

<sup>18</sup> Ambe, etwe twoosi bhano tutakwiikuundikirya mubhusyo ne ekitaambaara, tureerekya obhuguungo bhwo Omukuru kyeego ekirore kikweerekya epicha. Na neetwe turakyoosibhwa okurwa obhuguungo tee obhuguungo obhukuru eziisiku zyoosi. Omukuru niwe Ekoru, neewe arakora emirimo giyo, okubha tutuubhane neewe.

## 4

*Eziinguru zya Taatabhugya mubhigiro bhyo obhutoto*

---

† 3:13 Rora Okurwa 34:33-35.

<sup>1</sup> Ambe, kwo okubha Taatabhugya atuheeri emirimo gino kwe ebhigoongi bhyaaye, tutakukwa emitwe.

<sup>2</sup> Twaangiri kimwe kukora amang'ana go obhwiibhisi na ge eziisoni. Tutakukaangirirya abhaatu, tutakusaangya eng'ana ya Taatabhugya no orurimi. Nawe, turagaamba obhuheene kubhweero, okubha abhaatu bhoosi bhamenye mumitima gyaabhu kubha etwe ni bhaatu bhe eheene embere wa Taatabhugya.

<sup>3</sup> Nawe, eraabhe Amang'ana Amazomu gano tukurwaazira abhaatu gatakumenyekana bhuzomu, gatakumenyekana kubhano bhakubhura abheene.

<sup>4</sup> Abhaatu bhayo bhatakumwiikirirya Yeesu, kwe ekigirirye kya Seetaani, omutemi we ekyaaro kino, akuundikiirye obhwoongo bhwaabhu. Kiyoye nikyoye kigirirye bharatamwa kurora obhweero bhwa Amang'ana Amazomu iguru yo obhuguungo bhwa Krisito, wuno niwe atuubheeni na Taatabhugya.

<sup>5</sup> Etwe tutakuraarika amang'ana geetu, nawe turaraarika kubha Yeesu Krisito niwe Omukuru, neetwe ni bhagya bheenyu, kwo okubha turamuhokeerya Yeesu.

<sup>6</sup> Taatabhugya akabhuga, “Obhweero bhuhbare mukiirima.”\* Na neewe niwe akubhara muziikoro zyeetu, no okutukora tumenyeekererye obhuguungo bhwaaye, bhuno bhukubhara mubhusyo bhwa Yeesu Krisito.

<sup>7</sup> Nawe etwe bhano tuno obhweero bhuyo, turi kye ebhigiro bhyo obhutoto, okubha

---

\* **4:6** Rora Obhweemero 1:3.

emenyekane kubhweero kubha, amanaga amakuru go okukora emirimo giyo gararwa ku Taatabhugya, etari kuneetwe.

<sup>8</sup> Turabhona eziinyaako nzaru, nawe tutakuhizwa. Turabhona obhwiitiimaati, nawe tutakukwa emitwe.

<sup>9</sup> Turanyaakibhwa, nawe Taatabhugya atakututiga abheene ego. Bharatusiinda haasi, nawe tutakukwa.

<sup>10</sup> Kwo okuhitira enyaako, emibhiri gyeetu girageenderera okugwaatana kuruku rwa Yeesu, okubha obhuhoru bhwa Yeesu bhurorekane mumibhiri gyeetu.

<sup>11</sup> Etwe abhahoru, turageenda no oruku eriibhaga ryoosi kwiiguru wa Yeesu, okubha obhuhoru bhwaaye bhurorekane mumibhiri gyeetu gino gikukwa.

<sup>12</sup> Kweego, etwe turasetwa no oruku, nawe emirimo gyeetu nigyo gikubhakora emwe murabhona obhuhoru.

<sup>13</sup> Amakaamo Amahoreeru garabhuga, “Nikamwiikirirya Taatabhugya, niko ekigirye nikabhuga.”† Na neetwe kweeki turiikirirya, niko tukubhuga.

<sup>14</sup> Tumenyiri kubha, Taatabhugya wuno akamuryoora Omukuru Yeesu, araturyoora etwe, na aratureeta hamwe neemwe embere waaye.

<sup>15</sup> Eziinyaako zyoosi zino tukubhona ni kwiiguru weenyu, okubha orubhaango rwa Taatabhugya rubhahikire abhaatu bhaaru kukiraho na kukiraho, bhamukumye Taatabhugya bhukong’u. Okutuukana na riyo,

---

† 4:13 Rora Zaburi 116:10.

Taatabhugya arageenderera kuguungibhwa.

*Obhuguungo bhwa kirakeego*

<sup>16</sup> Kweego, tutakukwa emitwe. Yiingabha emibhiri gyeetu gikuunguhiri, nawe muusi weetu Taatabhugya araturora abhahya eziisiku zyoosi.

<sup>17</sup> Niragaamba ego, kwo okubha enyaako yeetu ni ihuhu na kwiibhaga iguhi ego. Kweeki, eratubhanurira obhuguungo bhwa kirakeego. Obhuguungo bhuyo ni bhukuru bhukong'u, kukira eziinyaako zyoosi.

<sup>18</sup> Kweego, tutakwiiseega ebhigiro bhino bhikurorekana, nawe, bhino bhitakurorekana, kwo okubha bhino bhikurorekana ni bhi ibhaga iguhi ego, nawe, bhino bhitakurorekana, ni bhya kirakeego.

## 5

<sup>1</sup> Tumenyiri kubha, emibhiri gyeetu ni kye eriibhuru rye eriibhaga iguhi mukyaaro muno. Nawe tumenyiri kubha, hano gikusarika, Taatabhugya aratuha enyuumba yino etakwoombokwa kwa amabhoko ga abhaatu, nawe ni nyuumba yino eri mwiisaaro rya kirakeego.

<sup>2</sup> Mumibhiri gyeetu gya bhoono turanyahaarika, kweego turiigoomba bhukong'u kuhaanwa eziinyumba zyeetu eziihya, no okwiibhohibhwa emibhiri gyeetu emihya gya mwiisaaro.

<sup>3</sup> Hano tukwiibhohibhwa emibhiri emihya, tutakubha king'aabhi.

<sup>4</sup> Eriibhaga tukyaari mubhihuuna bhyeetu, turanyahaarika bhukong'u muziikoro zyeetu, kwo okubha amang'ana maaru garatutama. Etari kubha tureenda okuruusya emibhiri gino gikukwa, nawe tureenda okwiibhohibhwa emibhiri gino gitakukwa, okubha emibhiri gino gikukwa gimirwe na gino gitakukwa.

<sup>5</sup> Taatabhugya niwe atubhanwiiri kwiiguru wa amang'ana gayo, na atuheeri Ekoru Muhoreeru, okubha abhe omwiimeerereri wa gayo.

<sup>6</sup> Kweego, tune eriisigo eriibhaga ryoosi, yiingabha tumenyiri kubha, hano tukwiikara mumibhiri gino, turi kure no Omukuru.

<sup>7</sup> Turiikara kwe enzira yo obhwiikirirya, etari kwe enzira yo okurora kwa ameeso.

<sup>8</sup> Eheene tune eriisigo, na turarora hakiriku tuungatigiri emibhiri gino, no okugya kwiikara no Omukuru.

<sup>9</sup> Kweego, eraabhe turiikara mumibhiri gino, kasi eraabhe turiikara kwo Omukuru, eriiseego ryeeetu ni kumuzomeerya ewe.

<sup>10</sup> Niigo, tukweenderwa etwe twoosi turiimeerera embere we ekituumbi kyo omuriinga kya Krisito, okubha wuyo woosi atinirwe ekiina na ahaabhwe amariho kuriing'aana na gano yakoriri mukyaaro kino kwo omubhiri gwaaye, gabhe mazomu kasi mabhiihu.

### *Okugwaatania abhaatu*

<sup>11</sup> Ambe, tumenyiri kubha tureenderwa okumusuka no okumwiigwa Omukuru. Kweego, turakora omukya okubharuta abhaandi, okubha bhabhone okumwiikirirya. Taatabhugya

atumenyiri bhuzomu kyeego turi, na neenye nine erisigo kubha emwe mutumenyiri bhuzomu mumutima gyeenyu.

<sup>12</sup> Etari kubha turiikoombakoomba kweemwe, nawe tureenda okubhaha omweeya gwo okwiikumya kwiiguru weetu. Kwe enzira yiyo, murabha na amang'ana go okubhakoora bhano bhakwiikumirya gano bhakoriri embere ya abhaatu, etari kyeego bhari muziikoro zyaabhu.

<sup>13</sup> Eraabhe turarorekana kya abhayaanga, ni kwiiguru wa Taatabhugya, nawe eraabhe turarorekana tuno obhwoongo, ni kwiiguru weenyu.

<sup>14</sup> Obhuseegi bhwa Krisito bhuratukaangata etwe, kwo obhugazuro bhuyo, tumenyiri kubha omuutu wumwe akakwa kwiiguru wa abhaatu bhoosi, obhugazuro bhwaku ni kubhuga abhaatu bhoosi bhakakwa.

<sup>15</sup> Neewe akakwa kwiiguru wa abhaatu bhoosi, okubha bhano bhakwiikara, bhatige kwiikara kwiiguru waabhu abheene, nawe bhiikare kwiiguru wa wuno akakwa no okuryooka kwiiguru waabhu.

<sup>16</sup> Kweego, kweemera bhoono tutakumurengya kweeki omuutu wowoosi kwo okumurora ego. Yiingabha eribhaga eriirebhe twaari turamurengya Krisito kwe enzira yiyo, nawe bhoono tutakukora ego kweeki.

<sup>17</sup> Omuutu wowoosi wuno agwaateeni na Krisito, abheeri omuutu omuhya, amang'ana ge ekare gahitiri, amahya gahikiri!

<sup>18</sup> Gayo goosi ni mirimo gya Taatabhugya. Ewe

atugwaateenie neewe kwe enzira ya Krisito.\* Na neetwe atuheeri emirimo gyo okweereky a abhaatu enzira yo okwiigwaanibhwa na Taatabhugya.

<sup>19</sup> Niigo okubhuga kubha, kuhitira ku Krisito, Taatabhugya yaari arabhiigwaania abhaatu neewe, okutama okubhabharira ebhibhi bhyaabhu. Na atuheeri etwe omurimo gwo okubhabhuurira abhaatu amang'ana go obhwiigwaani bhuyo.

<sup>20</sup> Ambe, Krisito atutumiri kukora emirimo gyaaye, kwo okuhitira kweetu Taatabhugya arabhasabha mwiigwaane neewe. Kiy o nkyo kikugirya turabhasabha kwiiguru wa Krisito kubha, mwiigwaane neewe.

<sup>21</sup> Krisito ataari ne ebhibhi bhyobhyoosi, nawe Taatabhugya akamubharira ebhibhi bhyeetu bhyoosi, okubha etwe tubharwe bhe eheene embere wa Taatabhugya kuhitira kweewe.

## 6

<sup>1</sup> Bhoono, kwo okubha turakora emirimo hamwe na Taatabhugya, turabhiisasaama kubha orubhaango rwa Taatabhugya runo musung'aaniri, mutarutiga rubhure bhusa.

<sup>2</sup> Taatabhugya arabhuga mu Makaamo Amahoreeru,  
 “Kwe eriibhaga rino rikweenderwa,  
 nikakwiigwa,  
 orusiku rwo obhutuurya, nikakusakirya.”\*

---

\* **5:18** Rora Abharooma 5:10.      \* **6:2** Rora Isaya 49:8.

Ambe itegeerera, eriibhaga rino rikweenderwa ni rino, orusiku rwo obhutuurya ni runo!

*Okwiikong'eererya mumirimo gya Taatabhugya*

<sup>3</sup> Tutakumukorera omuutu wowoosi eng'ana yoyoosi yino ekumubhiihira, okubha obhuhokya bhweetu bhutagaambwa bhubhi.

<sup>4</sup> Nawe, tureerekya mumang'ana goosi kubha, etwe ni bhahokya bha Taatabhugya.

Turiikong'eererya bhukong'u munyaako nzaru.

<sup>5</sup> Tutemirwe bhubhi, tubhohirwe mukibhoho, na amahizo ga abhaatu bhatumwaayiiri.

Tukoriri emirimo mikong'u, tukateengeeza no okuraambuka ne enzara.

<sup>6</sup> Kweeki turiiyeerekya kubha abhabhagati bha Taatabhugya kwo obhuheene, kwo obhumenyi, kwo obhwiikong'eererya, kwo obhuzomu, kwo obhukaangati bhwe Ekoru Muhoreeru, kwo obhuseegi bhwe eheene

<sup>7</sup> na kwo obhurwaazi bhwa amang'ana go obhuheene. Turakora gayo goosi kwo obhuturo bhwa Taatabhugya. Eheene nikyo ekigwaato kyeetu, orubhaara rwo obhuryo na rwo obhumosi.†

<sup>8</sup> Etwe turamuhokeerya Taatabhugya, abhaatu bharaatusuuke kasi kutuzeera, bharaatukumye kasi kutugaamba bhubhi. Turarorekana kubha turi bhabheehi, nawe turagaamba obhuheene.

<sup>9</sup> Turarorekana kya bhano tutamenyekeeni, nawe turamenyekana bhuzomu. Turarorekana

---

† **6:7 Orubhaara rwo obhuryo na rwo obhumosi**, obhugazuro bhwaku ni kubha, okubhoko kwo obhuryo nikwo kukugwaata ekigwaato, no okubhoko kwo obhumosi nikwo kukugwaata engubha yo okwiiriibha.

kya bhano tukukwa, nawe turi bhahoru!  
Tutemirwe bhubhi, nawe tukyaari kwiitwa.

<sup>10</sup> Turarorekana kya abhaatu bhe ebhigoongi,  
nawe eribhaga ryoosi tuno obhuzomererwa.  
Turarorekana kya abhataka, nawe  
tubhaniibhirye bhaaru. Turarorekana tutana  
kyokyoosi, nawe tune ebhigiro bhyoosi.

<sup>11</sup> Emwe Abhakoriinto, tugaambiri neemwe  
kubhweero bhukong'u, kwo okubha  
turabhaseega kwe eziikoro zyeetu zyoosi.

<sup>12</sup> Etwe tukyaari kutiga kubhaseega emwe,  
nawe emwe niimwe mutigiri kutuseega etwe.

<sup>13</sup> Bhoono ndagaamba neemwe kya abhaana  
bhaane, kubha mubhe muratuseega kwe  
eziikoro zyeenyu zyoosi, kyeego etwe  
tukubhaseega emwe.

### *Okugwaatana na abhaatu bhano bhatari abhiikirirya*

<sup>14</sup> Mutagwaatana na abhaatu bhano bhatari  
abhiikirirya. Mbe, eheene no obhubhi bhuratura  
kwiigwaana heene? Obhweero ne ekiirima  
bhiraturabhwi kubha hamwe?

<sup>15</sup> Kweeki Krisito na Beriari‡ bharaturabhwi  
kwiigwaana? Omwiikirirya na wuno atari  
omwiikirirya bhano obhwiigwaanoki?

<sup>16</sup> Bhuriho obhwiigwaanoki gati we  
eriiseengerero rya Taatabhugya ne emisaambwa  
gyo okubhaazwa? Etwe ni iseengerero rya  
Taatabhugya wuno ari muhoru!§ Kyeego  
Taatabhugya omweene akabhuga,

---

‡ **6:15 Beriari** ni riina eriindi rya Seetaani.  
Abhakoriinto 3:16; Abhaefeso 2:20-21.

§ **6:16 Rora 1**

“Ndiikara hamwe nabho no okugeenda gati  
 waabhu.  
 Ndabha Taatabhugya waabhu, nabho bharabha  
 abhaatu bhaane.”\*  
 17 Kweego Omukuru akabhuga,  
 “Murwe gati waabhu, mwiiyaahure nabho.  
 Mutakunia kigiro ekinyaka,  
 niho neenye niraabhasuung’aane.”†  
 18 Kweeki akabhuga,  
 “Ndabha Wuuso weenyu,  
 neemwe murabha abhamura na abhaakya  
 bhaane.  
 Omukuru, Taatabhugya wo Obhuturo Bhwoosi  
 abhugiri!”‡

## 7

1 Bhoono, abhaseegwa bhaane, Taatabhugya  
 arageenie okutuha gayo goosi, kweego,  
 twiiyeerye kwo okutigana na amakire goosi, go  
 omubhiri na ge ekoro. Tubhe abhahoreeru  
 kumang’ana goosi kwe enzira yo okumusuka no  
 okumwiigwa Taatabhugya.

### *Obhuzomererwa bhwa Pauro*

2 Mutuhe omweeya muziikoro zyeenyu, kwo  
 okubha tutaamusariirye muutu wowoosi,  
 tutaamunyahaariri wowoosi, na  
 tutaamukaangiriirye wowoosi.

3 Nitakugaamba amang’ana gayo okubhatinira  
 ekiina, kwo okubha nimariri kugaamba, emwe  
 muri muziikoro zyeetu, turi hamwe neemwe

\* **6:16** Rora Abharaawi 26:12; Yeremia 32:38; Ezekieri 37:27.

† **6:17** Rora Isaya 52:11. ‡ **6:18** Rora 2 Samweeri 7:14; 1  
 Amang’ana ge Eriibhaga 17:13.

ebhe ni kwiikara hamwe, naabhe ni kukwa hamwe.

<sup>4</sup> Ndagaamba neemwe kwo obhukararu bhukuru, kweeki ndiikumya bhukong'u kwiiguru weenyu. Munigosoreerye bhukong'u na mukoriri nibhe no obhuzomererwa bhukuru, yiingabha turanyaaka bhukong'u.

<sup>5</sup> Hano twaahikiri Makedonia, tukatamwa okumuunya, kwo okubha twaari ne enyaako mbaara zyoosi. Igutu haari ne eriihi, muziikoro zyeetu twaari ne ehaho.

<sup>6</sup> Nawe Taatabhugya wuno akubhagorerya bhe ebhigoongi, akatugosorerya kwo okuuza kwa Tito.

<sup>7</sup> Ne etari kwo okuuza kwa Tito omweene okutugosorerya, nawe neemwe mukamugosorerya ewe. Akatubhuurira kyeego mukwiigoomba okuundora, na kyeego mukubha ne ebhigoongi no okuninyaakira enye. Gayo ganikoriri nizomererwe bhukong'u.

<sup>8</sup> Yiingabha enyaarubha yino niabhakaamiiri ekagirya mubhe ne ebhigoongi, nitakubhaabhayira. Ni heene kubha, niabhaabhayiri kubhutaangiro, kwo okubha nimenyiri enyaarubha yiyo ekabhaha ebhigoongi, nawe kwiibhaga iguhi ego.

<sup>9</sup> Nawe bhoono nirazomererwa kubha nikakaama enyaarubha yirya, etari kwo okubha mukabha ne ebhigoongi, nawe kwo okubha ebhigoongi bhyeenyu bhibhakoriri mute ebhibhi bhyeenyu. Mukakorerwa ebhigoongi kyeego Taatabhugya akeenda, kweego tutaabhanyahaariri kwe enzira yoyoosi.

<sup>10</sup> Ebhigoongi bhino bhikutuukana no obhugirirye bhwa Taatabhugya, bhurakora abhaatu bhate ebhibhi bhyaabhu. Okuta ebhibhi kuyo kutari eng'ana yo okubhaabhayira, kwo okubha bhurareeta obhutuurya. Nawe ebhigoongi bhino bhiratuukana na amang'ana ge ekyaaro, bhirareeta oruku.

<sup>11</sup> Rora kyeego bhurya ebhigoongi bhino Taatabhugya akeenda, bhimbhareeteeri obhweera bhukuru! Bhubhakoriri kubha no obhwiigoombi bhukuru kwo okukora gano gakweenderwa no okwiisasaama kugano mukukora. Kweeki bhubhakoriri okubhiihirirwa obhubhi, okumusuka no okumwiigwa Taatabhugya, okwiigoomba okunirora, no okubha no omukya gwo okurora kubha wuno asarirye, asuong'aaniri obhutmwa bhwaaye. Muziinzira ziyo zyoosi, mweerekirye kubha mutana isarya mumang'ana gayo.

<sup>12</sup> Kweego, yiingabha nikabhakaamira enyaarubha yirya, nitaabhakaamiiri kwiiguru yo omuutu wuno amusariirye bhubhi owuundi, kasi iguru ya wuno asariirwe bhubhi. Nawe nikeenda mureore abheene embere wa Taatabhugya, kyeego mukwiiruusya kwiiguru weetu.

<sup>13</sup> Muriyo mutugosoreerye. Kutuuma riyo, tukazomererwa bhukong'u hano twamuruuzi Tito kyeego yaari no obhuzomererwa, kwo okubha emwe mwoosi mukamuzomeerya ekoro yaaye.

<sup>14</sup> Enye nikabhakumya bhukong'u embere waaye, na neemwe mutaanisuukirye. Goosi gano twaari tukubhabhuurira gaari ge eheene.

Kweego, gano tukabhakumya embere wa Tito, nago gamenyekereerwe kubha ge eheene.

<sup>15</sup> Obhuseegi bhwa Tito kweemwe bhurageenderera kwaaruha, hano akuhiita obhwiigwa bhweenyu mwoosi na kyeego mukamusuung'aana kwo obhusuuku na kwo okurigita.

<sup>16</sup> Bhoono ndazomererwa bhukong'u, kwo okubha ndanagya kubhiisiga bhukong'u.

## 8

### *Ekoro yo okusakirya abhaandi*

<sup>1</sup> Bhoono, abhahiiri bheetu, tureenda tubhabhuurire iguru yo orubhaango rwa Taatabhugya runo abhaheeri abhaatu bha amakanisa mukyaaro kya Makedonia.

<sup>2</sup> Abhaatu bhayo ni bhataka bhukong'u, kweeki bhakasakibhwa munyaako nzaru, nawe bhaari no obhuzomererwa bhukuru bhuno bhukabhagirya bhakabha abhasaambaaruku bhukong'u bho okuruusya ebhigiro bhyaabhu.

<sup>3</sup> Nirabhamenyeekeererya kubha, bhakaruusya ebhigiro bhyaaru, naabhe kuhita obhunagya bhwaabhu. Kweeki bhakaruusya kwo obhuseegi bhwaabhu obhweene.

<sup>4</sup> Bhaari bharatwiisasaama bhukong'u kubha, bhabhone omweeya okugwaatana mumirimo gyo okubhasakirya abhahoreeru bha Yerusaremu.

<sup>5</sup> Bhakakora ego, kukira kyeego twaari tukwiisiga. Bhakiiruusya hiinga ku Mukuru, okumara bhakiiruusya kweetwe, kyeego Taatabhugya akweenda.

<sup>6</sup> Kweego, tukamwiisasaama Tito, yiize abhasakiryemwe okumara emirimo giyo gyo orubhaango, kwo okubha niwe yaagitaangiryemwe.

<sup>7</sup> Muno obhuniibhi bhwa amang'ana goosi. Muno obhwiikirirya, obhunagya bhwo okugaamba bhuzomu, obhumenyi, omukya mukuru gwo okukora amazomu, no obhuseegi bhweenyu kweetwe.\* Ambe, ego niigo, mubhe abhaniibhi bho orubhaango mumirimo gino gyo okubhasakirya abhaandi.

<sup>8</sup> Nitakugaamba gayo okubha nibhaswaagye, nawe nireenda kurora eraabhe obhuseegi bhweenyu ni bhwe eheene, kwo okubheerekyakyeego abhaandi bhano bhano omukya gwo okusakirya.

<sup>9</sup> Emwe mumenyiri orubhaango rwo Omukuru weetu Yeesu Krisito kubha, akiikora mutaka kwiiguru weenyu, yingabha yaari muniibhi, okubha kuhitira mubhutaka bhwaaye, emwe mubhe bhaniibhi.

<sup>10</sup> Bhoono, nirabhatoongera rino rikweenderwa kweemwe. Omwaaka guno gwahitiri,† mwaari bho okutaanga okwiigoomba okusorora no okutaanga kukora ego.

<sup>11</sup> Bhoono, mumare emirimo giyo kwo okwiigoomba kuyokuyo, kyeego mwaari nagwo hano mweendiri okugitaanga, mwiiruusye kuriing'aana na bhino munabhyo.

---

\* **8:7** *Obhuseegi bhweenyu kweetwe*, obhugazuro obhuundi bhuratura kubha, *obhuseegi bhweenyu bhuno bhurwiiri kweetwe*.

† **8:10** Rora 1 Abhakoriinto 16:1-4.

<sup>12</sup> Eraabhe omuutu ane ekoro yo okusakirya, Taatabhugya arasuung'aana kukino akuruusya kuriing'aana na bhino anabhyo. Taatabhugya atakumura kino omuutu ataanakyo.

<sup>13</sup> Nitakugaamba gayo, okubha emwe munyaake, na abhaandi bhabhe hakiriku,

<sup>14</sup> nawe nireenda muriing'aane. Eriibhaga rino mune ebhigiro bhyaaru. Kweego, mubhasakirye bhano bhatana ebhigiro, okubha nabho hano bhakubha ne ebhigiro bhyaaru bhabhasakirye emwe muraasuuhirwe kigiro. Kwo okukora ego murabha muriing'eeni,

<sup>15</sup> kyeego ekaamirwe mu Amakaamo Amahoreeru, "Wuno yaakumeenie bhyaaru, ataahiingikeeni, na wuno yaakumeenie bhisuuhi, ataasuuhirwe."‡

*Tito na abharikyaaye bharatumwa Koriinto*

<sup>16</sup> Niramukumya Taatabhugya wuno amuheeri Tito ekoro yino enye woosi ninayo yo okubhasakirya emwe.

<sup>17</sup> Niragaamba ego, kwo okubha hano twaamusabhiri yiize kweemwe, akiikirirya. Kweeki, araaza kweemwe kwo okweenda kwaaye omweene, akubha no obhwiigoombi bhukuru bhwo okubhasakirya.

<sup>18</sup> Hamwe neewe turamutuma omwiikirirya omurikyeetu owuundi, wuno arakumibhwa mumakanisa goosi kwe ekigirirye kye emirimo gyaaye gyo okuraarika Amang'ana Amazomu.

<sup>19</sup> Kweeki amakanisa gamusoriri omuhiiri wuyo, okubha abhe hamwe neetwe hano

---

‡ 8:15 Rora Okurwa 16:18.

tukuhira obhusakirya kubhaatu. Emirimo giyo gyo obhuseegi giramuguungya Omukuru, na gireerekya kyeego tune ekoro yo okusakirya abhaandi.

<sup>20</sup> Tutakweenda tuririirirwe no omuutu wowoosi iguru wo obhwiimeerereri bhweetu bhwo okuhira ebhigiro bhino abhaatu bharuusiryeye kwo obhusaambaaruku bhwaabhu.

<sup>21</sup> Obhugiriryeye bhweetu ni kukora amazomu, etari embere wo Omukuru omweene, nawe ne embere wa abhaatu.

<sup>22</sup> Turamutuma omwiikirirya omurikyeetu owuundi hamwe na bha Tito. Omuhiiri wuyo yiyeeerikirye kweetwe maanga nzaru kwe enzira nzaru kubha ariigoomba kukora emirimo. Bhoono ariigoomba bhukong’u kukira kubhutaangiro, kwo okubha ane erisigo ikuru kweemwe.

<sup>23</sup> Bhoono, eraabhe omuutu areenda kumenya amang’ana ga Tito, ewe ni murikyaane, na arakora emirimo hamwe neenye okubhasakirya emwe. Ne eraabhe omuutu areenda kumenya amang’ana ga abhaandi bhano bhakuuza hamwe neewe, bhayo bhatumirwe na amakanisa, nabho bharareeta obhuguungo ku Krisito.

<sup>24</sup> Kweego, mubheerekye abhaatu bhayo obhuseegi bhweenyu, okubha amakanisa gamenye kubha tunabhwo obhugiriryeye bhwo okwiikumya iguru weenyu.

## 9

*Obhusakirya bhwa abhiikirirya bha Yerusaremu*

<sup>1</sup> Bhoono nitana kyo okubhakaamira iguru yo obhusakirya bhweenyu kubhahoreeru bha Yerusaremu,

<sup>2</sup> kwo obhugazuro nimenyiri kubha mune ekoro yo okubhasakirya abhaandi. Nikyo ekigirirye niriikumya iguru weenyu kubhaatu bha Makedonia, ndabhabhuurira kubha, emwe abhaatu bhe ekanisa ya mukyaaro kya Akaaya, mukiibhanura okuruusya omwaaka guno guhitiri. Omukya gweenyu guyo, gubhakoriri bhaaru gati waabhu kubha ne ekoro yo okuruusya.

<sup>3</sup> Ambe, ndabhatumana abhiikirirya abharikyeetu bhano, okubha munagye okweerekye eheene mukiibhanura okuruusya, kyeego nikabhabhuurira abhaatu bha Makedonia. Amang'ana gano nikiikumya iguru weenyu, nitakweenda garorekane kubha gatana bhugazuro.

<sup>4</sup> Eraabhe niraaze kweemwe hamwe na abhaatu abhaandi bha Makedonia no okubhona mukyaari kwiibhanura, hayo murabha mutusuukirye, kyeego twaari ne eriisigo ikuru kweemwe. Kweeki na neemwe murabha ne eziisoni zino zitakuhaywa.

<sup>5</sup> Kweego, nduuzi kubha ni bhuzomu nibhasabhe abhiikirirya abharikyeetu bhano, bhatukaangatire okuza kweemwe eyo, okubha bhabhanure ebhigiro bhirya mukaragania okuruusya. Kwe enzira yiyo murabha muruusirye kwo okweenda, etari kwo okuhatikwa.

*Okuruusya ekimweeso kwe ekoro yo*

*obhuzomererwa*

<sup>6</sup> Muhiite eng'ana yino, “Omuutu wuno akweemya bhisuuhu, aragesa bhisuuhu, na wuno akweemya bhyaaru, aragesa bhyaaru.”

<sup>7</sup> Omuutu aruusye kwo obhusaambaaruku mukoro yaaye, etari kwe ebhigoongi kasi kwo okuhatikwa, kwo okubha Taatabhugya aramusega omuutu wuno akuruusya kwe ekoro yo obhuzomererwa.

<sup>8</sup> Taatabhugya aranagya okubhatweera ebhite kukira bhino mukweenda, okubha erii bhaga ryoosi mubhe na bhyoosi bhino mukweenda, mugeenderere kukora amazomu maaru go okusakirya abhaandi.

<sup>9</sup> Ni kyeego ekaamirwe mu Makaamo Amahoreeru, “Aruusiry e kwe ekoro yoosi, okubhaha abhataka, ebhigoongi bhyaaye ni bhya kirakeego.”\*

<sup>10</sup> Taatabhugya niwe akumuha omuutu eziimbibho zyo okweemya ne ebhyaakurya ebhyeene. Egoego, arabhaha no okwoongerya obhuturo bhweenyu no okugirya amagesa go obhusaambaaruku gati weenyu.

<sup>11</sup> Arabhaha obhuniibhi mugoosi, okubha munagye kubha abhasaambaaruku eziisiku zyoosi. Hayo niho abhaatu bharabhuga, “Ozomirye, Taatabhugya,” kwiiguru we ebhigiro bhino tukubhahirira okurwa kweemwe.

<sup>12</sup> Erabha ego, kwo okubha emirimo gino gyo okuginihya gino mukukora, gitakusakirya abhiikirirya bha Yerusaremu bhano

---

\* **9:9** Rora Zaburi 112:9.

bhasuuhirwe abheene, nawe girakora abhaatu bhaaru bhamuguungye Taatabhugya bhukong'u.

<sup>13</sup> Bharamuguungye Taatabhugya, kwo okubha emirimo gyeenyu gireerekyā kubha emwe ni bhabhagati bhazomu. Kweeki bharamuguungya kwe ekigirirye kyo obhusuuku bhweenyu kwo okwiikirirya Amang'ana Amazomu iguru wa Krisito, na kwe ekigirirye kyo obhusaambaaruku bhweenyu bhwo okubhasakirya ebho na abhaandi bhoosi.

<sup>14</sup> Bharabha bharabhasabhira ku Taatabhugya kwo obhuseegi bhukuru, kwe ekigirirye kyo orubhaango rwaaru runo Taatabhugya abhaheeri emwe.

<sup>15</sup> Tubhe turamubhuurira Taatabhugya azomirye, kwe esaambo kuru yo okuruguurya yino atuheeri.

## 10

### *Pauro arabhakyoorā bhano bhakumuzeera*

<sup>1</sup> Ambe, abhaatu abhaandi bharabhuga, enye Pauro ni munyoochu hano nikubha hamwe neemwe, nawe omuhaari hano nikubha kure. Kweego, ndabhiisasaama kwo obhusuuku no obhunyoochu bhwa Krisito.

<sup>2</sup> Nirabhiisasaama kubha, mutaanikora nibhe muhaari hano nikuuza kweemwe eyo. Niragaamba ego, kwo obhugazuro, nimenyiri niranagya kubha muhaari kubhaatu bhoosi bhano bhakwiiseega kubha, etwe turiikara kya abhaatu abhaandi bha mukyaaro kino.

<sup>3</sup> Yiingabha turiikara mukyaaro kino, tutakurwaana eriihi kya abhaatu bha mukyaaro kino.

<sup>4</sup> Ebhigwaato bhye eriihi ryeetu bhitari bhino abhaatu bhakurwaanira mukyaaro kino, nawe ni bhino bhine eziinguru zya Taatabhugya, na bhiragwiisya eriigoobhe ryoosi ryo omubhisa.

<sup>5</sup> Turasarya amiiseego goosi go orurimi na amang'ana goosi go okwiikumya gano gakuribhira abhaatu okumumenya Taatabhugya. Kweeki turagwaata amiiseego goosi, okubha gamwiigwe Krisito.

<sup>6</sup> Na hano mukubha abhiigwa mugoosi, etwe turabha twiibhanwiiri okutina ekiina kumang'ana goosi gano gatari go obhwiigwa.

<sup>7</sup> Mugaroreerere amang'ana gano gari embere wa ameeso geenyu! Omuutu wowoosi wuno akwiirora kubha ewe ni wa Krisito, ahiite kubha neetwe twoosi ni bha Krisito, kyeego ewe.

<sup>8</sup> Hamwe niriikumya bhukong'u iguru yo obhunagya bhuno Omukuru atuheeri. Nawe nitakurora soni, kwo okubha obhunagya bhuyo bhutakubhasarya, nawe bhurabhagumirya mubhwiikirirya.

<sup>9</sup> Nitakweenda nirorekane kweemwe kubha, ndeenda kubhakaanga muziinyaarubha zyaane.

<sup>10</sup> Niragaamba ego, kwo okubha bharabhuga, “Eziinyaarubha zya Pauro zina amang'ana makong'u, kweeki amang'ana mahaari. Nawe hano akubha hamwe neetwe atakubha na amanaga, kweeki amang'ana gaaye garabha gatana bhweera.”

<sup>11</sup> Omuutu wuno akubhuga ego, amenye

kubha, gano tukubhakaamira hano turi kure, nigo gano turaakore hano tukubha hamwe neemwe.

<sup>12</sup> Etwe tutakusakya okwiibhara hamwe na abhaatu bhano bhakwiikumya! Nawe bhatamenyiri ryoryoosi kwo okubha bhariiring'ania abheene kwa abheene no okwiituubhya abheene kwa abheene.

<sup>13</sup> Nawe etwe tutakwiikumya kuhita ekireengo kye emirimo gino tuheerwe. Turiikumya ego iguru we emirimo gino Taatabhugya atuheeri. Emirimo giyo nigyo gino tukukora naabhe kweemwe.

<sup>14</sup> Tutakwiikumya kuhita ekireengo kye emirimo gyeetu, eraabhe tuungabheeri turakora tukyaari okuhika kweemwe. Nawe etwe twaari bho okutaanga okubhareetera Amang'ana Amazomu iguru wa Krisito.

<sup>15</sup> Kweeki tutakwiikumya iguru we emirimo gya abhaatu abhaandi, emirimo gino etwe tutaheerwe. Nawe turiisigira kubha, eraabhe obhwiikirirya bhweenyu bhurageenderera okukura, niigo emirimo gyeetu gatigati weenyu gikubha giriyoongerya.

<sup>16</sup> Hayo niho tukunagya okuraarika Amang'ana Amazomu mubhyaaro ebhiindi bhino amang'ana gayo gakyaari kuraarikwa. Nikyo tutakwiikumya iguru we emirimo gino omuutu owuundi yaagikoriri hagiroya ahaandi.

<sup>17</sup> Amakaamo Amahoreeru garabhuga, "Omuutu wuyo woosi wuno akwiikumya, yiikumye kwiiguru wo Omukuru."\*

---

\* **10:17** Rora Yeremia 9:24.

18 Obhugazuro bhwaku ni kubha, omuutu wuyo woosi wuno akwiikumya omweene atakwiikiribhwa, nawe wuno Omukuru akumuzomera, niwe akwiikiribhwa.

## 11

### *Pauro na abheega bho orurimi*

<sup>1</sup> Yiringabha ndagaamba kyo omugeege, ndasabha muniitegeerere.

<sup>2</sup> Enye ndabharorera eriihari emwe, eriihari rino rikurwa ku Taatabhugya, kwo obhugazuro muri kyo omuukya wuno atamumenyiri musubhe, wuno niamuyuungiirye omusubhe wumwe, niwe Krisito.

<sup>3</sup> Nawe bhoono ndoobhoha, kyeego Haawa yaang'eenirwe ne enzoka eng'eeni yirya, na neemwe mutaaza kung'eenwa, mubhutige obhuseegi bhweenyu bhwe eheene ku Krisito.

<sup>4</sup> Niragaamba ego kwo okubha emwe mbaangu okusuung'aana omuutu wuno akuuza okurwaaza Yeesu owuundi, wuno etwe tutaamurwaaziri. Kweeki, murasuung'aana ekoro owuundi kasi amang'ana agaandi, gano mutasuung'aaniri okurwa kweetwe.

<sup>5</sup> Enye nirarora kubha nitasuuhiirwe kigiro kyokyoosi, kino bhanakyo bhayo bhakwiikora abheega abhakuru.

<sup>6</sup> Naabhe niraarorekane kubha nitakugaamba bhuzomu, nawe obhumenyi bhwaane ni bhukuru. Tweerekirye riyo kweemwe eriibhaga ryoosi na kwe eziinzira zyoosi.

<sup>7</sup> Nikiiyiikya kwe enzira yo okuraarika Amang'ana Amazomu ga Taatabhugya kweemwe

okutama kubhona amariho, okubha emwe mukumibhwe. Nikakora kibhi eng'ana yiyo?

<sup>8</sup> Eriibhaga nikakora emirimo kweemwe, niari ndasuung'aana obhusakirya okurwa mumakanisa agaandi. Ni kyeego niari nikubharuusya ebhigiro bhyaabhu, okubha nibhasakirye emwe.

<sup>9</sup> Hano niari hamwe neemwe, nitaari murigo kumuutu wuyo woosi kukusuuhirwa. Abhiikirirya bhano bhaarweereeri Makedonia bhakaaniha bhino niari nikweenda. Kweego nikiiriha okubha nitabha murigo kweemwe naabhe hasuuhu, kweeki niroongera okwiiriha.

<sup>10</sup> Atariho omuutu naabhe wumwe mukyaaro kyoosi kya Akaaya, wuno araaniribhire okwiikumya iguru wa amang'ana gayo. Ndagaamba gano kwo obhuheene bhwa Krisito bhuno bhuri muusi waane.

<sup>11</sup> Nitakugaamba ego kwo okubha nitabhasegiri, Taatabhugya amenyiri kubha ndabhaseega.

<sup>12</sup> Niroongera kukora kyeego nikukora bhoono, okubha abheega bhano bhakubhuga nibho abhakuru, bhatamwe okwiikumya kubha bharakora kyeego etwe.

<sup>13</sup> Abhaatu kya bhayo ni bheega bho orurimi, nibho abhabhagati abhang'eenererya, bhariikora kya abheega bha Krisito.

<sup>14</sup> Muriyo tutakuruguura, kwe ekigirirye naabhe Seetaani omweene ariikora kyeego maraika\* wo obhweero.

---

\* **11:14 Maraika.** Rora eng'ana yino mu Bhugaruri bhwa Amang'ana Amakong'u.

15 Kweego tutakuruguura hano abhahokya bhaaye bhakwiikora kya abhabhagati bhe eheene. Obhuteero bhwaabhu bharasuung'aana gano gakuriing'aana ne emirimo gyaabhu.

*Pauro ariikumya iguru we enyaako yaaye*

16 Ndabhabhuurira kweeki, omuutu atiiseega kubha enye ni mugeege! Nawe eraabhe muriiseega kubha enye ni mugeege muniitegeererere kyo omugeege, okubha niikumye hasuuu kyo omugeege yiingiikumirye.

17 Amang'ana gano nikugaamba bhoono go okwiikumya, nitaheerwe no Omukuru, nawe niragaamba kyo omuutu omugeege.

18 Abhaaru bhariikumya kwiiguru ya amang'ana ga mukyaaro, kweego, ambe, na enye tiga niikumye.

19 Emwe kwo okubha muriirora muna amang'eeni, nikyo mukwiikong'eererya abhageege kwo obhuzomererwa.

20 Muriikong'eererya no okumwiikirirya naabhe omuutu wuno akubhakora kyamuna emwe ni bhagya bhaaye, arabhiibhira no okubhateesya ebhigiro bhyeenyu, kweeki ariirora ni mukuru kukira emwe no okubhatema mubhusyo.

21 Nirarora eziisoni okugaamba kubha etwe twaari bhanyookobhu bhukong'u kukora gayo!

Bhoono niragaamba kyo omugeege kubha, eraabhe ariho omuutu wuno akweenderwa okwiikumya iguru wa kyokyoosi, na neenye nireenderwa okwiikumya.

22 Eraabhe ebho ni Abheeburania, na neenye ni Mweeburania. Eraabhe ebho ni Abhiiziraeri, na

neenye ni Mwiiziraeri. Eraabhe ebho ni bhe ekisyooko kya Aburahamu,<sup>†</sup> na neenye ni we ekisyooko kya Aburahamu.

<sup>23</sup> Bhoono nigaambe kyo omuyaanga, eraabhe ebho ni bhahokya bha Krisito, enye ni muhokya wa Krisito kukira ebho. Enye nikoriri omukya kukora emirimo kukiraho, maanga maaru nibhohirwe munyuumba ya abhabhohwa, kweeki nitemirwe bhukong'u, maanga maaru niari muhabhi ho okukwa.

<sup>24</sup> Nitemirwe na Abhayahudi ebhiteme miroongo etatu na keenda (39), nikorirwe ego maanga kataano.

<sup>25</sup> Nitemirwe eziihiimbo na Abharooma katatu koosi, nitemirwe na amagina rugeendo rumwe, emeeri enisarikiiri katatu koosi, kweeki nikiikara munyaanza obhutiku no omwiisi.

<sup>26</sup> Maanga kaaru, muziingeendo zyaane, niari muhabhi ho okuzoorwa ne ebhitaaro, muhabhi ho okugwaatwa na abhateesya, muhabhi ho okutemwa na Abhayahudi abharikyaane na abhaatu bhano bhatari Abhayahudi. Niari muhabhi mumigye, mwiitirigo na munyaanza. Niari muhabhi ho okunyaakibhwa na bhano bhakwiikora abhiikirirya abharikyeetu.

<sup>27</sup> Nikoriri emirimo mikong'u gyo okurosy kwiibhaga itaambi, niteengeeziri, ndaambukiri ne enzara, ne enyoota, maanga maaru nihaasiibha no okwiikara muumbeho nitana ngibho zyo okwiisa.

<sup>28</sup> Hamwe na gayo goosi, eziisiku zyoosi

---

<sup>†</sup> **11:22 Aburahamu.** Rora eng'ana yino mu Bhugaruri bhwa Amang'ana Amakong'u.

nirahizwa ne emirimo gyaane iguru ya amakanisa goosi.

<sup>29</sup> Eraabhe omuutu wumwe ni munyookobhu, na enye niriyiigwa munyookobhu. Eraabhe omuutu wumwe amugirirye owuundi akore ebhibhi, na neenye nirabha no obhururu.

<sup>30</sup> Eraabhe ereenderwa okwiikumya, niriikumya iguru wo obhunyookobhu bhwaane.

<sup>31</sup> Taatabhugya, Taata wo Omukuru Yeesu Krisito, wuno akweenderwa okukumibhwa kirakeego, amenyiri kubha nitakugaamba orurimi.

<sup>32</sup> Eriibhaga niari mumugye gwa Damesiko, omukaangati wo omugye guno yaari mubhutemi bhwa Areta, akatuura abhariibhi mubhiseku bhyo omugye guyo okubha bhanigwaate.

<sup>33</sup> Nawe abhaatu abharebhe bhakaanituumya mugusehi kuhitira mwiidirisha rino ryaari munyiki yo omugye, nikahona okugwaatwa.‡

## 12

### *Obhurori bhwa Pauro no obhunyookobhu bhwaaye*

<sup>1</sup> Nireenderwa okwiikumya, yiingabha kutana bhweera bhwobhwoosi. Nawe, ndeenda okwiikumya iguru wo obhurori na amang'ana agaandi gano Omukuru Yeesu anierekirye.

<sup>2</sup> Nimumenyiri omuutu wumwe Omukrisito, wuno emyaaka ikumi ne ene gino gyaahitiri,

---

‡ **11:33** Rora Amahokya ga Abheega 9:23-25.

akagegwa kugya mwiisaaro.\*† Nitamenyiri hano yagegirwe yaari no omubhiri guno, kasi ataari na mubhiri. Taatabhugya niwe amenyiri.

<sup>3-4</sup> Nimenyiri kubha omuutu wuyo akagegwa tee kuhika erya Paradiso.‡ Kweeki ndabhuga, nitamenyiri eraabhe yagegirwe no omubhiri guno, kasi ataari no omubhiri guno hano yagegirwe. Taatabhugya niwe amenyiri. Mwiisaaro eyo, akiigwa amang'ana go okuruguurya bhukong'u gano omuutu atakunagya kugaamba, na gatakweenderwa kugagaambwa.

<sup>5</sup> Bhoono, niriikumya iguru yo omuutu wuyo, nawe nitakwiikumya kyeego niri. Niriikumya omweene iguru yo obhunyoobhu bhwaane.

<sup>6</sup> Naabhe niingeendiri okwiikumya, nitiingabheeri mugeege, kwo okubha niari ndagaamba ge eheene. Nawe ndiiriha okwiikumya, okubha omuutu wowoosi atige okunirora enye kubha nirang'arira bhukong'u kukira gano bhakugarora no okugiigwa okurwa kweenye.

<sup>7</sup> Nawe, okubha amang'ana gano amakuru gano nikuundukuriirwe gataanikora nigwaatwe okwiizuungya, nikahaabhwa enyaako kumubhiri gwaane yino ni kye eriihwa rino rikusoma. Enyaako yiyo ni mugya wa Seetaani wuno atumirwe okubha aninyaakye, nitaaza

---

\* **12:2** Pauro ariigaambira ewe omweene niwe yagiiri mwiisaaro, soma omukiriri gwa muhuungati oramenyeekererya. † **12:2** **Mwiisaaro** ku Kiyunaani ni *riisaaro rya katatu*. ‡ **12:3-4** **Paradiso** ni hagiyo hano abhaatu abhahoreeru bhano bhakuuri bhakumuunyira.

okwiikumya bhukong’u.

<sup>8</sup> Nikamusabha Omukuru katatu koosi anituurye munyaako yiyo.

<sup>9</sup> Nawe ewe akaanibhuurira, “Orubhaango rwaane ruriisa, kwo okubha mubhunyookobhu nimwe amanaga gaane garakuunaana.” Kweego nirabha ndiikumya kwo obhuzomererwa bhukuru iguru yo obhunyookobhu bhwaane, okubha amanaga ga Krisito gabhe muusi waane.

<sup>10</sup> Kweego, nino obhuzomererwa iguru yo obhunyookobhu, okutukwa, eziinyaako maanga maaru zyo okuniriimbozenia iguru wa Krisito. Nino obhuzomererwa, kwo okubha hano nikubha munyookobhu, niho nikubha ne eziinguru.

### *Obhwiitiimaati bhwa Pauro iguru wa Abhakoriinto*

<sup>11</sup> Bhoono, niragaamba kyo omugeege, kwo okubha emwe niimwe munigirirye nigaambe ego. Emwe mwaari mureenderwa munikumye, yiingabha ndarorekana kubha nitakung’arira, enye nitari mweega omusuuhu kukira bhano mukubhuga kubha, abheega abhakuru.

<sup>12</sup> Hano niari kweemwe, niari no obhwiikong’eererya, kweeki nikakora ebhyeerekenio, ebhiruguuro ne ebhitiika bhino bhikweerekya kubha enye ni mweega.

<sup>13</sup> Kitariho kyokyoosi kino niakoriri mumakanisa agaandi, kino nikyaari kukora kweemwe. Hamwe nikabhasariirya hano nitaari murigo kweemwe? Eraabhe riyo niryo obhubhi bhwaane, muniabhire!

14 Bhoono niriibhanura okuuzza kweemwe kurugeendo rwaane rwa katatu, nawe nitakubha murigo kweemwe. Nitakweenda ebhigiro bhyeenyu, nawe nirabheenda emwe. Niragaamba riyo kwo okubha abhaana bhatakweenderwa okubhiika ebhigiro bhibhe bhya abhiibhuri, nawe abhiibhuri bhareenderwa okubhiika ebhigiro okubha bhibhe bhya abhaana.

15 Enye ndazomererwa okuruusya ebhigiro bhyaane naabhe okwiirusya omweene okubhasakirya emwe. Nawe, erarorekana kubha, hano nikwoongerya okubhaseega, niho emwe murasuuhya obhuseegi bhweenyu kweenye.

16 Muriikirirya kubha nitaari murigo kweemwe, nawe naabhe ego abhaandi bharabhuga, “Pauro ni mung’eeni, abhakorokoombiri kwo obhung’eenereru.”

17 Bhoono, nikagega kyokyoosi kwo obhung’eenererya, kwo okuhitira abhaatu bhano nikabhatuma?

18 Nikamwiisasaama Tito hamwe no omwiikirirya omurikyeetu okubha yiize kweemwe. Bhoono, Tito akagega kyokyoosi kweemwe? Mutakurora kubha enye na neewe ni kigiro kimwe mumirimo, naabhe eteemwa yeetu ni yimwe?

19 Hamwe muriiseega kubha eriibhaga rino ryoosi, turiisasaama embere weenyu? Nawe turagaamba gano embere wa Taatabhugya, kwo okubha turabha tugwaateeni na Krisito. Abhaseegwa bhaane, gano goosi tukukora ni

kwiiguru yo okubhasakirya mugumire mubhwiikirirya.

<sup>20</sup> Bhoono ndoobhoha kubha, erii bhaga rino nikuuza kweemwe, ndabhabhona mune eteemwa yino etakunzomera enye. Riyo riranigirya nikore gano mutakuzomerwa emwe. Ndoobhoha kubha niranagya kubhabhona muno eriiyoge, omugono, obhururu, obhwiimani, obhumoonyi, orurimi, obhwiizuungya no orwaambi.

<sup>21</sup> Kweeki ndoobhoha kubha hano nikuuza kweemwe, Taatabhugya waane araniikya embere weenyu. Nirabha ne ebhigoongi kurora abhaatu bhaaru gati weenyu bhano bhakakora ebhibhi hiinga, bhakyaari okuta ebhibhi. Bhakyaari bhane eziiteemwa eziimbiihu zya amakire, obhuseebheeti na amang'ana agaandi ge eziisoni.

## 13

### *Obhurekya bhwo obhuteero*

<sup>1</sup> Runo rurabha orugeendo rwaane rwa katatu okuuza kweemwe. Amakaamo Amahoreeru garabhuga, “Obhusarya bhwoosi bhutinirwe ekiina kwo okubhaho abhamenyeekererya bhabhiri kasi bhatatu bho okumenyeekererya.”\*

<sup>2</sup> Hano niiziri kweemwe rugeendo rwa kabhiri nikabhabhuurira, hano nikuuza kweeki nitakubha ne ebhigoongi na abhaatu bhano bhakoriri ebhibhi. Bhoono ndabhabhuurira kweeki nikyaari kure neemwe, nitakubha ne ebhigoongi kweebho.

\* **13:1** Rora Obhuhiiti bhwe Emigiro 19:15.

<sup>3</sup> Nirakora riyo kwo okubha mureenda ekyeerekenio kyo okumenya kubha Krisito aragaamba okuhitira kweenye. Krisito atari munyookobhu kweemwe, nawe ane eziinguru zyo okukora emirimo gati weenyu.

<sup>4</sup> Ni heene kubha Krisito akabhaambwa kumusaraba mubhunyookobhu, nawe bhoono ni muhoru kwo obhuturo bhwa Taatabhugya. Niigo ego etwe tuno obhunyookobhu kyeego Krisito yaari, nawe hano tukubhahokeerya emwe, turabha bhahoru kyeego ewe ari kwo obhuturo bhwa Taatabhugya.

<sup>5</sup> Bhoono mwiireengye na mwiisuunze abheene, okubha mumenye eraabhe muno obhwiikirirya. Mutamenyiri kubha Yeesu Krisito ari muusi weenyu? Eraabhe etari ego, hayo obhona mutamirwe ekireengo kyo obhwiikirirya.

<sup>6</sup> Nawe ndiisiga muramenya kubha, etwe tukyaari kuhizwa ekireengo.

<sup>7</sup> Turamusabha Taatabhugya mutakora eng'ana yoyoosi embi. Etari kwe ekigirirye tureenda turorekane kubha tung'ariiri okuhiza ekireengo kiyo. Nawe tureenda mukore amazomu, naabhe etwe turorekane kubha tuhizirwe.

<sup>8</sup> Ndabhuga ego, kwo okubha tutakunagya okwaanga obhuheene, nawe turanagya okugeenderera okuraarika obhuheene.

<sup>9</sup> Turazomererwa kwe ekigirirye etwe ni bhanyookobhu, nawe emwe mune eziinguru. Turamusabha Taatabhugya abhasakirye mugumire mubhwiikirirya bhweenyu.

<sup>10</sup> Nirabhakaamira amang'ana gano nkyaari kuuza, okubha hano nikubha kweemwe, ntagarora gano gakutura okunikora nibhe omuhaari kuriing'aana no obhunagya bhuno Omukuru aniheeri. Ndagaamba ego, kwo okubha obhunagya bhuno Omukuru aniheeri bhutari obhunagya bhwo okusarya, nawe ni bhwo okubhasakirya mugumire mubhwiikirirya.

*Amang'ana go okuraga*

<sup>11</sup> Bhoono, abhahiiri bhaane, tubhuukiri!† Mukuunaane mubhwiikirirya bhweenyu, mugosoreranie, mubhe no obhumwe no omureembe. Neewe Taatabhugya wo obhuseegi no omureembe arabha hamwe neemwe.

<sup>12</sup> Mukeerenie kwo obhuseegi bhwa Krisito. Abhahoreeru bhoosi bha hano bharabhakeerya.

<sup>13</sup> Orubhaango rwo Omukuru Yeesu Krisito, no obhuseegi bhwa Taatabhugya, no obhugwaatani bhwe Ekoru Muhoreeru, bhubhe hamwe neemwe mwoosi.

---

† **13:11 Tubhuukiri**, obhugazuro obhuundi bhuratura kubha, muzomerewe.

**Eriiragano Eriihya**  
**The New Testament in the Zanaki language of**  
**Tanzania: Eriiragano Eriihya**

copyright © Wycliffe Bible Translators, Inc.

Language: (Zanaki)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

---

PDF generated using Haiola and XeLaTeX on 11 Mar 2026 from source files dated 13 May 2025

59cdaa0a-a2d1-5bd9-b56f-be1ffc1ff2aa